

太玄金錄金鎖流珠引序

中華仙人李淳風序并註

思一

太上三五太玄金錄者即元始天尊傳太上大道君也號高聖太上玉晨玄皇大道君註元始分身也或云天尊弟子為萬道之主道君傳紫清太素高虛洞曜三元上道君君傳紫晨太微天帝道君註時號上清至真道尊為三十六天之主也君傳紫明太微九道高元玉晨道君又傳太上老君註一云太上老君是太上道君弟子非師太微天帝應是傳太白金闕帝辰後聖玄元上道君也此亦是太上老君分身故稱託胎出號老子而授流珠履斗之法太微天帝君之下玉晨道君傳紫元太微八素三元玄晨元君君傳紫微元靈龜臺九靈太真元君註主教訓天下學真之人君傳大靈上霄飛晨中央黃老君君傳太元東霞搏桑丹林大帝上道君君住搏桑傳二十真人中土絕傳紫晨太微天帝道君傳上清太白金闕帝辰後聖玄元玉皇上道君註一云玉皇大帝大道君是也主下理十天

封掌兆人上通上清為後聖君前聖太上道君稱萬道之主號曰虛皇後聖太上老君稱萬道之君號曰玉皇自有金闕帝君官巨具足亦如世人君人臣之任各有主掌天宮九野皆周也君姓李名暉字伯陽改金錄名之曰太玄三五金鎖流珠經錄正論履斗步綱之要錄有八十六篇四十三卷上詣太上老君號高聖太上玉晨玄皇大道君請此四十三卷下傳世人係代為真君真臣願度十天註九野之數并下天界曰十天世界為上天神仙都玉京稱玉皇上帝也以自撰略為一十五卷正經及掌訣圖書論步綱躡紀之事總號之金鎖大名次流珠次飛步天綱次即禹步地紀傳二十卷與尹君號後聖大法師左上卿卿傳方諸大真人皆佐後聖聖又傳後聖太師註天師是也太微左真保皇道君註主封授兆人三天之上九天官上後聖又傳九微太真玉闕上相大司命高晨師東海玉明青華小童道君註主教知真而得真者有志修之人得正度傳法為上真仙都玉

京金闕後聖玉皇帝君下仙之巨後聖君又傳後聖上保註君封此位司南極太丹元君紫元夫人註主教當為真人者便授太丹之經流珠之訣夫人有二人一紫微夫人姓李後聖君第三女曾事清河王君註方平小子也子為周穆王上宰相年百年而已性不於道著功夫人勸行履斗之法不行也註名仲春君又傳白山太素真君註合同玉下教真道也後聖君又傳後聖上宰註仙家上宰臣總真之位如世上尚書宰相之位西極總真王君註主教成真者便行教修金鎖流珠金經金錄之道多有拔宅上昇家口俱去者至多也總真傳南極南嶽真人左仙公太虛上真赤君註主教當為真人者即授此流珠飛步之道與君下界與行之又傳侍帝晨領五嶽司右弼王桐栢真人王君佐後聖君後聖君再授玄洲註一云古州字是也二十九真人註主關泰仙名應合受師奏授錄法今試不過與過者校量先奏後聖玉皇帝可保仙官職名二十九真各主九地萬國千山萬水

下界人名王之秦楚南海小童君主之蒸齊
此真大童君主之宋衛鄭梁西靈童主之都
管東海者大童君主之各主諸方界關奏合
有仙功著仙關於太平金闕後聖君便令教
試依功給道可仙給仙可真與真其中除仙
真外亦有三等上等著功者註功是內心先
行仁德於人救治疾病貧乏後行履斗服符
日月年歲之功也非世廣造土木為觀寺是
人天之善未必得為功德與道永乖也風見
西胡人神之教亦不令人苦造土木等寺廟
亦令守心行十善之教如年夏深成可告天
天給金剛本佛受者經乃言功德功德滿道
成矣今見時人至心捨募捨力為捨廟殿宇
者甚多不見有一人得道也皆却被五行行
瘟之鬼與土木之神返害其身喪家滅代者
多風積梁志蕭帝好重佛教仍令朝臣以佛
經為業一年於都下起三百六十大寺廣度
僧尼不修兵甲後果被賊臣所禁身死國亡
豈非此之事非功德之理也夫人欲學至道
須明功德之理慎勿以此慎修行之業也第

一等者修身慎行謹言無妄修鍊真心好樂
經典讀誦立功香火連宵與人治患更遇六
甲神符服而年深且得不死人之仙矣再
修得遇仙師授此圖經方以履步細斗亦得
為真人神仙第二等者好鍊金石以為真至
之藥救人疾病堅身理藏服餌於山間林藪
亦遠萬壽百年不死死後亦不為下鬼便得
託生受其本福第三等志心好道隨從明師
不遠萬里捨心供力不憚勞苦年月深遠師
自與言功記德即教此經傳授之後志心修
行却獲功德於師先得關奏後聖當與給道
補為真人者多矣此三等說後聖告正一真
人註張天師也及總真王君金闕聖君又授
紫微左夫人註主教當成真人者三試過
即先奏金闕始道封真也又下教授二十四
真人昇天為二十四玉京左右金闕上真官
御史臣註主教檢諸天諸地生民之事量定
得真之功修年月深淺之數奏度章表又使
王君總真下校授茹盈字仲甫等為司命君
註主領教學適當為真人者而試之令教合

道之志者當以教之盈以訓二弟及二許註
子父仙也楊左六人盡以授修行此經也後
以諸方仙真得者皆因此經或以
天尊上真前聖虛皇上帝大道君授傳或以
前聖太上天宰道君所傳後聖玄元玉皇帝
大道君或分身再傳或以後聖大宰天師總
真係代相授賜拔宅妻子俱昇如此得仙真
之眾或隱去或見白日上昇者人數蓋多不
可一一而書記也今以略舉相繼以為引首
之目敘其前聖後聖金口所傳金錄玉圖流
珠引次用前後合行用依科排比篇名一
一圖分折其祕要內訣引入其大道之門修
行得者總代付授後學高賢心命合仙之士
即不得妄傳非人此引黑書者老君所授赤
書者後聖君再言天師受告及王君傳錄具
一一注於書後篇用一一隨卷題配之
太玄三清金鎖流珠譜序此金鎖兩字本尹
君傳王君又傳流
字珠兩
王君問曰何為金鎖流珠尹君曰太上老君
還太真尊位號上清太平金闕帝天師及王

君授弟子王二君註一王長二王子登曰前
 聖虛皇上帝大道君即元始太上道君是也
 後聖玉皇上帝玄元上道君是也註一云太
 上大道君應前位玉晨後聖玄元上道君改
 金錄名號金鎖名始其意金鎖本說鎖魂鍊
 魄求生去死之法本說堅身如金留神繫鎖
 註一云留神如鎖謂之金鎖舊金錄說之口
 誦金鎖註呪名金鎖是理自身流珠乃助固
 以救他人足履金網註步天綱曠地紀是也
 故名此兩字以授後賢曉達其名應時得道
 王君再問流珠何不解說尹君曰流珠是北
 斗九星也註北斗七星見二星不見并不見
 者九星也人以修行步綱故曰流轉隨珠註
 晝夜斗轉周天無窮如水流之不絕星圓如
 珠故曰流珠也本名金錄行法註舊金錄辭
 言行法鎖神四字為首後聖君改行法名流
 珠即今飛步七星配衣九斗伐惡收逆是也
 太上尹真人於後聖君傳授金鎖流珠四字
 指有三清註玉清上清太清是也天師造三
 清序尹真人著三清詞王君歌三清曲註皆

言從一得三從三得五從五得七從七得九
 此言三天陽數也足於九也上極太一註一
 天也下包二儀註地也二儀生四四生六六
 生八八生十註皆從道始生極陰之數也玉
 清之上帝曰虛皇大道君註元始之號玉清
 之中帝曰高皇太上道君註太上道君之號
 上高皇註太上通君也上清之上玉清之下
 帝曰玉皇註太上老君也又一云後聖太平
 君太清之上上清之十曰天皇上帝太一尊
 神註太一道君是也一云太一師天也太極
 之尊神曰天也道之子學道之人知三清正
 主可以學當今上清之主後聖君註道主也
 太清太一君註天主也主之夫妻奏皆先從
 太清過入上清注入仙名亦先從太清注訖
 始入上清注上金牌也後聖君告諸真人欲
 求真之道先須從禹步即飛天綱註禹者衣
 也本明字是正音因夏禹理水得過此天文
 步綱之法禹學之四年道成使蛟龍虎豹鬼
 神之法開決江河歸海理水有功後入聖真
 改為此禹字因禹也功滿後三十年肉身昇

仙禹今為太極真人羣臣時見禹妹俱去以
 收衣冠葬于會稽山山留遺廟名可著於三
 清如空步天綱不知禹步之道身不得昇三
 清三清亦無名籍為地府不奏天曹无名註
 夫人雖是天生植養於地生死之命雖屬於
 天善惡之功須關於地地之靈者先須制之
 故制地步地紀制天攝天綱神靈伏也世人
 不知此道不得朝三清其金鎖流珠本經本
 起玉清大道君也本名金錄玉錄內經註天
 尊名之金錄玉錄也後聖改之金錄名金鎖
 玉錄號流珠因以傳授矣

2-51 v. 078